

胡伊先生存

地824
959

洪東旅行記
佩卓題

病驥旅行記之
第十二種
庚申校刊

序一

麗中宰秦之二年吳子桐園自無錫參觀教育歸出侯葆三先生西秦旅行記相示環誦一過乃知先生以苦教育爲宗旨者也因念秦邑處萬山中民貧地瘠非講求苦教育不爲功爰有夏期單級教授研究會之設延先生主講席麗中遂得親其丰采共議論唱酬相得甚歡適遘瓜期非久去秦而先生以課畢先行晤遲離早能無悵然間嘗彙錄到秦來所著公牘文字分公文判詞批示三種分檢稿輯而成之得若干卷顏曰羅陽治事錄特丐先生一言以爲重慨諾之次更以獲東旅行記弁首相委噫麗中不文何足以重先生哉無已姑就先生之旨而推言之或可自文其陋乎先生有言無時無地不可作教育觀則此番來秦主講席授單級固教育也而往來道路所經耳目所及凝者山流者水蔚然者草木以至蠢而爲物靈而爲人風俗之淳漓人心之厚薄形形色色不勝枚舉亦皆教育也然則先生之旨無往而非教育卽無往而不用其苦人生貴及時行樂抑何自苦乃

浙東旅行記

錫成公印代司

爾豈知先生之苦正其所以爲樂也今夫世之爭權攘利者如蟻之赴羶蠅之赴腥輿致勃勃自以爲樂幸而得之唯恐或失時思有以保持之甚或意猶未足益思有以擴張之疲精敝神無一息之或安樂耶苦耶稍有知識者當能辨之其不幸而不得或旣得而復失更不待言矣由此觀之先生之苦豈不勝若輩之樂萬萬哉是以辦學數十年足跡遍天下家毀而名益著形雖勞而神益清故曰其苦正所以爲樂也嗚呼世之爭權攘利者聞先生之風可以猛省矣庚申孟秋燮元黃麗中序於羅陽萬羅山亭

序二

曩者侯子病驥涉炎荒越榛棘以冀伸其覺人覺世堅志苦行之旨以成教化嘗于英于荷領域罹百憂遭巨辱訖不爲動而其志愈銳其識若慮亦日增其宏密旣歸萃其所得記載甫竟適永嘉令黃以書至啗以其治之山水之勝約與偕遊且以教育講演要之夫病驥於教育事業童而習之其所見與其所性匪埃深論

病驥固當世之壯遊者也每觀禹域內外有涉雄峻寫異崎嶇險僻之所大都足跡必欲一至至則覈其自然人事界諸要况又或繫之以詩蓋往往發大造之闕使無遁形者已溫處天台雁蕩之勝亦我神州不多見之瑰異幽絕之地一峯一谷至爲神工鬼斧所不及鑿始蒼昊之原始畫圖歟且夫中工之良山水不爲尠矣芙蓉紫蓋淡抹濃妝芳草晴川煙霾日暮宵各有其極致今古詞人騷客更迭贊之斯山水幸亦山水之厄湖山有知恐不願聞何也平易之美未容或少然至使林林之衆悠悠之口爲無意義之嘆賞失其值矣病驥生平所值所歷有類涌泉飛瀑無一落於平陂故於匯蕩百有二峰之神奇秀異詭詭宵冥尤馳寤寐聞黃氏之請忻然命棹爲期凡月有半斯日月中講演之暇環歷諸勝蹟狀事狀物悉盡其奇信乎非病驥無以紀此山亦非此山不足辱病驥而無歉已而吾聞其間之居民風俗淳樸有優越於邦內其他勝地况得良有司以爲之治病驥之神契又在於斯故不憚以之惜託於其形之談述過安定宅瞿然有感於昔賢以

教爲治之意是則病驥用世之心之具正如夏雲之油然興起有雨編萬方之概矣吾人曷爲徒賞其游之奇而遇之奇哉是爲序共和九年雙十節海陵仲鳳鳴

浙東旅行記

臥病故鄉。條經半載。杜門秃筆。疾寫萬言。（自二月至五月病胃。凡三月餘。自四月至六月編輯南洋旅行記。凡十餘萬言。）山谷書來示我。浙東風景。梅村箋。至難忘。管社煙波。（黃知事燮元書來招游永嘉山水。吳君桐園前曾旅行。無錫考察教育。余偕游管社五里湖等名勝。故此次來函。猶道及之。）溫處雖遙。大好雁宕。天台之勝。輜軒所歷。可作芒鞋竹杖之游。借四日光陰。儘使侈談教育。走千餘里。水陸不妨力任馳驅。問俗采風。藉識永嘉社會。口講指畫。商量學校。絃歌。竭個人能力之所及。爲一時方法之改良。設館授餐。主人情重。子身獨步。客况艱嘗。際是非龐雜之時。莫問風飄。順逆掃新舊。異同之習。平心文化。維持苦行。尤貴苦言。吾舌固猶在也。（胡君惟賢贈余聯語曰：奇人奇事苦行苦言）狀景兼能。狀物斯編。試詳記之。病驥老人識於滬上寓廬。

鴻鑑此次旅行浙東。應泰順教育講演之招也。歸途道出樂清。藉游雁蕩之勝。

浙東旅行記

錫成公司代印

覺峯巒之奇。爲昔游各處山巒所未見。至大龍湫之瀑布。無陰無晴。終年不竭。天雨不增。天晴不減。似煙似雨。似玉屑似雪珠。半空情狀。與着地聲響。變化莫測。真奇觀也。彼廬山瀑布。華嶽飛泉。安能及此。而西石梁之瀑布。則尤獨有聲色。雁湖之高據山頂。由常雲峯往返四十里。似昔年火山窟。靈岩靈峯洞壑之奇奧。均足以流連游者而忘歸也。忽忽時日。游展未到處尙多。正所以留重游之地步耳。天台之游。亦俟諸異日。庚申中秋病驥附識。

九年七月十七日上午。豫備行裝。作浙游。應黃燮元知事。吳桐園君。單級教授。講演之約。下午乘車至滬。寓吳錫旅社。（由滬赴泰順之路。須乘海輪至溫州。由溫乘小輪至瑞安。由瑞安雇船至百丈口。乘轎至泰順。約七日可到。）

十八日往招商局。擬購船票。不料不但無船開往溫州。且需時日甚長。一因海宴入塢修理。一因廣濟遇風。約一星期後。方能回滬。如由海門或由寧波。皆須迂道而行。倘靜候直放溫州之船。時日雖須略待。海程較爲便捷也。下午遇蔣君韶九。

於商務印書館。約往振華旅館談話。返寓。適冰蘭慰女由錫來滬。因上車時。慰女不及送余。故隨冰蘭來滬。

十九日爲競志中學部體操教員事。往塘山路女青年會。訪陳女校長。晤談。顧生毅若袁生保珠知前所紹介之楊蔡二人。已有他處訂定。復紹介嘉興殷女士。陳校長謂姑商之。明日函覆如何。余諾之。往中華書局。訪陳君協恭。晤陸君伯鴻。李君默非。暢談現今教育之趨勢。慨盲從者之多也。晚訪蔣君韶九於振華。暢談時局。慨論現在教育實業政治等一切。韶九議論風生。不減當年氣概。今雖改任實業。然對於時局之關懷。猶有太息不置者。

二十日託立齋往船局詢船期。知本週無船進口也。訪協恭於中華書局。遇俞師仲還。略談余南游之艱險。返寓。午後發致泰順縣署黃燮元函。告以道路周折。不克即到。須稍待矣。晚訪溫州丁某於佛照樓。丁某勸余乘台州海輪較便云。偕立齋往吉陞棧。探詢船期。知自甬至溫之船。每週有三船。自滬往溫之船。僅一船耳。

二十一日往實學通藝館。訪胡介堂。爲泰順購鋼版印字器一副。知星期六有永利輪船。開往台州海門。又聞星期五有新北京輪船。開往寧波。均可轉往溫州。惟時日較遲耳。接顧生毅若函。知殷姓體操教員。已准往浙。而錫事作罷矣。余即往中國女子體操學校。訪王君季魯。晤華女士浩吾。徐生志雲。言及體操教員事。知有高女士培基。曾任汴女師教員。現返嘉善。須由王校長函商之。因告以須具有三種條件方可。(一)資格及經驗。(二)技能及精神。(三)能否屈就敝校。最輕之俸。給能屈就者。尤須有熱心及研究心。

二十二日閱報載台州海門水災。傷人及屋。沿海船埠。均爲水所沖壞。是以台州海門之行爲之一阻。往實學通藝館。知海門有時疫。上星期水災。疫癘死者七百餘人。於是決往寧波。繞道至溫州矣。午後訪陳協泰。託兌荷盾二百元。四四折。合八十八元。即爲浙游川資之用。是晚邀廈門白嘉祥莊偉卿葉谷虛三君。來寓晚餐。招立齋陪之。

二十三日在實學通藝館。晤鍾憲曾張之銘宇伯嚴二君。由唐駝紹介。同往某餐館午餐。繼由張君紹介。往時事報館。晤張雲雷李蓉川謝俠游等。開明赴寧波至溫州之路程。及由泰順返溫。游南北雁蕩之途經。並寫紹介書數通。明日江天船開。即託張君之銘代定房艙。晚致吳桐園函。言明此次赴泰爲時甚短。擬減少日期。加增時刻。否則往返之期不敷也。

二十四日胡君來云。江天船之房艙。客已滿。廣濟船已進口。不如仍趁廣濟之爲佳也。蓋赴甬則須星期二。開往溫州。趁廣濟則星期一。晚開。似較速耳。於是乃託胡介堂再往招商。代定廣濟房艙。午後電話問介堂。廣濟房艙有否。答云已指定。訪張雲雷。遇劉君。紹介游處州石門青田訪劉文成祠墓。蓋劉君爲青田人。文成之嫡後也。冰蘭携慰女返錫。晚定講演日期。寄黃燮元知事。擬定講演次序如下。(一)開會討論泰順教育之現狀二小時。(二)講演教育三十六小時。(三)聽講者提出問題一小時。(四)講者答問三小時。(五)共同研究實施方法二小時。共

約四十四小時。

二十五日介堂將代購廣濟由滬赴溫船票。送來。計票價六元。明晚開船。在旅館無事。豫定講演目次如下。(一)緒論。(二)泰順教育之現狀。(三)單級教授論。

(甲)單級教授之沿革及意義。(乙)單級教授與單式多級及複式合級之教授不同。(丙)單級教授與二部教授之不同。(丁)單級教授之效用與教育行政之關係。實施方法。(甲)編制。(乙)設備。(丙)教授。(丁)管理及訓練。(戊)單級教授之結果。家庭社會兩方面。對於學校之信用。(子)教員熱心耐苦。(丑)經濟省儉。(寅)學生成績優良。(卯)最近教育之趨勢。(辰)泰順須採用何種教育主義。(己)對於泰順教育之希望。(午)結論。是日風雨交逼。寓樓悶坐。晚九時即臥。接冰蘭寄來蘇州醫院藥粉十二包。

二十六日發致女子體操學校。延訂高培基女士。延訂書立齋招余午餐。下午二時半登招商局之廣濟輪船。住九號房艙。夜十二時開船。

二十七日晨出吳淞口。過華亭沙。有燈船。出三夾水。向正南行。按廣濟載重三百二十噸。有大餐間。價甚昂。須三十兩。有房艙十。乘客二十餘人。此外有統艙六十餘榻。容百三十人。乃船客竟有二百餘人。故遍地皆客矣。此船每點鐘行三十二里左右。自滬直達溫州海程。約三十六點鐘。可到計九百餘里。兩日可到。過大切洋小切洋。船小浪大。客多臥者。至羊山。有燈塔。風景殊佳。風浪較平。少頃風浪又起。船頗巔簸。余方午餐。記日記。態度如常。蓋曾經滄海。此種小巔簸。不值身體一搖動也。得詩一首。（記三夾水至羊山約百餘里間之海景）

遲我行踪曰旬日。儘他風浪歷千程。水流三夾天初曉。塔映中流燈尚明。淡遠嵐光聳。眉黛微茫。帆影任縱橫。羊山一角扁舟過。海景天然圖畫成。

是日因風浪過巨。故輪舟轉舵。駛入內海。道路較遠。而海程較穩。午後過舟山海峽。內海形勢成一弧形。約四五十里之天然形勝。論戰地則可泊兵輪。絕好之軍港也。論實業則可資養蓄。良好之漁場也。聞兩岸之山。已爲沿海居民開墾。種芋

植麥。亦已可觀。倘再注重漁業。設法興利。海權所在。慎勿棄之。夜月朗澈。微波顛蕩。暑氣漸涼。客夢初酣。同室之客。忽擾余夢。詢故則窗戶乍閉。氣悶啓窗也。自後遂轉輾不能成寐。夜過半始安寢。

二十八日上午氣候炎熱。人頗煩燥。午後一時。舟進溫州港。二時半到溫州。泊朔門外輪船碼頭。甌江曲折。約長五十里。有雙塔高聳者。曰江心寺。有雙塔聳立江濱者。一曰龜山。一曰蛇山。東望有塔。一曰巽山塔。共有五塔。溫州城門七。一曰朔門（卽北門）二曰西角門。三曰麻行門。四曰三角門（此三門在西門）五曰大南門。亦曰小南門。七曰東門。水門三。通船者二（卽大南小南）其一卽內河之水。放入甌江者。城內多小河。城倚山爲牆。四角皆山也。東北隅爲海壇山。西北爲谷公山。西南爲松臺山。東南爲資福山（內有資福寺）南門外有東山。山之陽。有飛霞洞。山之陰。有東山書院。又有東山下潭。城之周。約有十里。南北直經有四里。東西有三里。楊君爲余雇人力車。送至府前街本擬住甌江旅館。因船上無接客者。故

至維新書局。由陳君陪訪江蓬仙縣視學。未晤。城中近日風災。損失甚大。故舉步即須用小舟。僅需錢四五十文。亦甚便利。至勸學所。晤江蓬仙君。胡祖鼎君。（勸學所所長）晤談。即偕江君參觀溫州圖書館。偕王雋傾君久談。此君年六十九。尚能日往來鄉間。步行五六十里。家住鄉間。往返徒步。不知疲倦也。

此間風景尚可。三面臨水。東曰寡婦橋。西曰報安橋。湖曰小西湖。園曰籬園。爲曾氏依綠園故址。前清經學大儒孫詒讓先生之紀念祠也。晚偕梅挹芬君。（維新書局主人）董君伯豪名錫麒。陳遠侯。陳子廷等。晚餐于冰壺館。梅君爲東道主焉。（在董君處談話須臾）晚寓墨香簾。與梅君略談即去。天熱余入浴後方寢。余向墨香簾購南雁蕩記一部。價洋六角。

二十九日晨起。梅君來談。言及溫語之難通。有字義可求。而聲音全不相關者。如早餐曰吃天光。午餐曰吃日晝。晚餐曰吃黃昏。而其音則曰天果。曰乃酒。曰下膳。如名蛋曰卵。空曠之地曰坦。破碎之地曰拚。則又字義聲音。各有可通者。吾國語

言萬方各異。昔旅廈門及廣州。語言隔閡。舉動皆艱。今來溫州。又令我聞所未聞也。梅君云。由瑞安返永嘉時。中途有仙岩者。風景殊佳。便道可一游也。

往永嘉勸學所演說。先由儀徵包君報告。紹介余登壇演說教育之原理不變。教育之方法。須隨時勢之變更活動之。教育之職任。以有恆心。有耐心。不灰心。不消極。本良心教育以進行。而合乎時勢之關係。須有定識定力。以識別之。然後吸收新教育而不可盲從。尤爲至要。約二小時。由江君述謝辭。是日聽演說者均教育界人及國語講習會會員共百餘人。包君翔仲名璩。昔任江都小學教員。今任永嘉公署教育科助理員。此次知余來溫。曾往甌江旅館及輪埠探迓。以此間學界如沙君層川等。受泰順學界之函託招待。且無錫同鄉及江蘇同鄉之旅永者。又皆知余來溫。而欲在江蘇會館開會歡聚也。

晤沙君盛海（即層川）李君焜（讓仁）周君雪等。略談。即往某餐館午餐。是日在座者。爲沙君李君董君陳君（縣教育會會長）胡君（勸學所所長）梅君包君江

君等八人。而沙江陳包四人則東道主也。

永嘉調查所得教育狀況如左。
學校教育

省立中學校校長朱章寶。中學一、二、三、四年學生八組共三百三十人。
省立師範學校校長楊某。師範生五組共二百餘人。

附屬模範小學校主任李焜。高等小學三級。國民四級。共一百七十人。
永嘉縣立第一高等小學校校長沙盛海。學生三組共一百二十餘人。

溫屬六縣公立甲種商業學校一。乙種工業學校一。乙種蠶業學校一。此三校學生共有二百餘人。

永嘉全邑小學校。此外共計有高小十校。國民三百十二校。內有女學高小一。國民六在內。縣教育費四萬餘元。市鄉教育費十七區六萬元。高小學生數及國民學生數共三萬五千人。內有女生約占十分之一。

社會教育圖書館二。一溫州六縣公立圖書館。館長王毓英。館員二人。經費常年一千元。藏書五百七十五種。六千五百十八冊。閱覽人平均每日十一二人。閱書者學界人多。所閱書。科學爲多。一永嘉縣立圖書館。館長一人。館員二人。經費不滿五百元。藏書不多。地址在東山。閱書者不多。閱報所二。一在縣公署外。一在圖書館演講所。閱報之人尙多。

午後雇小划船赴瑞安。由水至瑞。水程七十里。須行七小時可到。江梅胡李陳董沙包諸君。送余至船埠。船體小洋十角。船小而狹。狀似脚划船而稍寬。兩人以雙槳划之。余送溫州圖書館以西泰記台灣記等書八種。王館長贈余廣雁蕩記八冊。因在舟中臥閱此書。頗足解悶。約行二十餘里。過小石橋三十餘架。水大村沒。兩岸田廬。均在水中央。橋低水高。舟人無不屈身而過。余起坐。忽見迎面有山橫阻。絕無水道。可通。覺山色撲人眉宇。頃間繞道山脚。從山隙小港划過。復得水。路清波盪漾。峯嵐四屏。誠臥游佳景也。得詩一首。

臥游快讀雁湖志。迎面忽看鷺尾峯。雙槳疑無溪路轉。扁舟不礙翠薇重。遙從山嘴穿叢荻。驚起沙鷗棲稚松。昂首嵐光撲眉宇。推篷四擁碧芙蓉。

是日舟行三十餘里。天已將晚。幸月色明朗。水路可行。至瑞安東門。已八點半鐘。繞北城而至西城外。泊船。即往泰順商務公所。訪高君伯鴻。託代雇梯船一隻。略坐食麵。即下船。自瑞至百丈口。一百四十里。須三日可到。言明送到百丈口。船價五元。搭客有泰順三都葉姓者同行。爲溫州中學畢業生。是晚臥舟中。

三十日晨五時。舟乘早潮開行。此間爲通甌江之潮。必潮來方可開船。否則山水暴漲。上流之水直瀉而下。恐一日僅能行三五十里耳。

瑞安城內有山二。一曰西山。在西門內。一曰龍山。在東北城隅。城外之水道。由永嘉直達小東門外七十里。在三十五里處。有山曰仙岩。有寺院。風景佳。瑞安西門外。曰泊船處。曰泰順埠。由此直達平陽坑。一百十里。卽飛雲江也。飛雲江通甌江者。故水爲潮水。每日有漲落。

余舟行一百里。遇順風。至平陽坑。正午後二時半也。平陽坑爲平陽之東邊界。此地爲瑞安平陽交界處。船由平陽坑上行。十里則水逆流。爲清水。舟行遲緩甚。幸風爲南風。故順。約兩小時達灘峽。此則灘河之口。灘水奔騰而下。兩面高山橫阻。形勢甚險。而風景甚佳。行灘河十里。至一最險處。灘水左右兩折。中隔沙渚。前阻一山。如揚子江中之燕子磯狀。此間地名高樓。舟子二人均下水。一推舟尾。一挽船首而行。急湍奔放。石卵縱橫。約二十分鐘。始折繞而過。對面曰下泉。自下泉行。水均急。而清可鑑人。河底離水面僅二三尺。深處亦僅五六尺。行五里曰地瀨。天已黑。適有雷雨。因停舟。寄宿于此。一日所行。共一百三十五里。所經行之飛雲江及灘河。均曲折。而兩面皆崇山峻嶺。臥游飽看山景。俯聽水聲。此境非江南水路可比也。得詩一首。錄左。

瑞安道中

飛雲江上扁舟過。四面嵐光撲面來。風捲澗泉疑鍊雪。水流灘峽駭奔雷。（此爲

自平陽坑灘河入口處之地名）高樓（地名）磯似江東燕地瀨航停轅下駘行路艱難固應爾快予好句錦成堆。

灘河之船名曰梯船。以前後共隔十格。中五格可以居客。前二格儲物。一格卽鷁首。後二格爲廚竈及置柁處。船底方平。所以利行灘河者。船首昂起。有象鼻。可以橫插竹竿。爲挽舟推舟之用者。其柁則長方形。所以便於灘河水淺處也。帆則方形。以竹篷爲之。蓬則以竹葉枝編織之。風順水逆。尙可行。風水皆逆。則日行三四十里。未可知也。但聞舟子呼風之聲。水石相接之聲。推挽用力之聲。與予篷底之吟聲相和也。此亦暑天旅行之苦中樂耳。梯船一首。

船底方平。船首昂。胡爲嘉號。錫梯航。祇因灘水奔流急。倒步雲程艱險嘗。推挽渾如惶恐過。蘇子惶恐灘頭說惶恐。恐余昔年赴贛州。曾過之。去來勘破利名忙。須知欲順貴先逆。此次旅行泰順波折行程至十五日之久。屈指計之尙未至泰順邑境。而灘河中水逆舟行尤艱苦也。苦裏工夫樂未央。余年來歷經痛苦頗

知順逆之定理與苦樂之眞境。有可偕同人相證者。殊多也。

三十一日晨開船行二十五里。至罌口。此爲瑞安青田泰順三邑交界處。灘水甚急。時已午。即午餐。午後舟行尤緩。蓋灘河曲折。山勢嵯峨。道路雖艱。而風景則甚佳。得詩一。

泰順道中

曲折灘河猛進難。奔騰萬馬亂流寒。輔舟相助始同濟。兩舟之人上相輔助始得同濟危難。孤棹前行知大觀。舟遇大樹峽危灘急湍。奔放直瀉臨河觀瀾。令人驚駭左右山勢奇。石俯瞰老樹槎枒尤形異。狀誠壯觀也。屋小臨厓猿鶴伴。仰視厓上往往有茅屋。臨厓而居。石危蹲岸虎狼看。幾番險阻安全過。落日潘凹（地名）渡急湍。

薄晚過花竹嶺。是日行五十五里。時夜月東透。照見山峯突兀聳起。聽水流之滾滾。似警人之不平。晚餐後。促舟子乘月夜行。乃從重灘絕壑間。行約五里。而停泊。

焉。地名坊泉。亦曰芳前。頃聞電聲。見墨雲重疊。已爲風吹散。月色照人。余因濯足。河干。頗覺涼爽。得詩二首。

晚過花竹嶺

風狂吹散千峰雨。水急遙吞一葉舟。柁轉灘迴沙渚梗。猿啼花落旅人愁。田家三五臨厓住。燈火微茫隔岸浮。回首忽驚山缺處。通明皓月吐當頭。

夜宿芳泉

纔從花竹嶺頭過。又涉芳泉水谷深。賴有月輪鏡。霄漢始依沙峽。礙波心眼前。多少不平境。物外須參至靜音。試向灘邊濯余足。清涼澈骨滌塵襟。

八月一日晨起舟行十里。至杉溪灘。由瑞至灘。二百四十里。中以此灘爲最奇險。水流上下。相去約三五尺。奔濤駭浪。集三舟之人。共同挽索而上。約歷二十餘分。鍾始道此灘。蓋山勢曲折。石骨嶙峋。水勢盤鬱。凡數曲焉。過此則杉溪也。有茅屋十餘家。停舟早餐。又行十餘里。過二灘。始至龍鬪。過龍鬪廿里。卽瞻宮埠。楊姓者。

登岸去。由此而行二里。曰小溪口。五里曰馬跡。五里曰江口。五里曰義公洋。又五里曰百丈口。是日上午在龍門上。有曰黃埠者。舟停兩小時。因舟人回家。將船擱埠頭。一聽客之所爲。可笑甚。雖急無用也。可恨甚。梯船之舟人。最爲可惡。懶惰成性。黠而貪。此亦山民之根性使然歟。迨至下午舟行允遲。五點半鐘。行至江口。忽雷電大作。大雨傾盆。約歷一小時。晚餐後。舟子停船。不肯行矣。再三催促。始允待月上而行。久之。月爲雲蔽。舟子擬明早再行。余不允。再三強之。乃行。雖冒險前進。而黑夜過灘。河急湍處。凡二十餘里。其險無比。幸舟子四人。在黃埠添雇一人。儘力前進。屢阻屢梗。舟由石上拖過。余亦深悔過於冒險矣。蓋此次大水。兩星期之暴雨。而山中之水驟漲。舟行甚艱險。爲黑夜行舟乎。至夜十一點半鐘。滔滔之灘聲。驚人奪目。約一小時之久。方過此灘。則百丈口至矣。

冒雨夜行自江口至百丈口

一天雷雨。萬山黯。十里灘流。百丈聲。黑夜孤舟。眞險。冒風狂。水逆。儘前行。

夜登百丈口。叩陳長發之門。而借宿焉。主人字吉甫。烹茶飲客。晤談即臥。

二日晨雇轎往泰順城。言明價二元。轎租一角。挑夫六角。此間之轎。爲余生平所見之轎中之奇者。蓋江西內地之轎。至簡單。僅竹枝樹枝繩索而已。爲第一奇轎。登泰山之轎。如兜。爲第二奇轎。今泰順之轎。有竹席一層。似榻狀。上蓋以蓆。製雖巧。而人必盤坐其中。一登山巔。則顛簸欲昏暈。此又似汴魯之車。頭暈無比者也。計自百丈口行至楊坑頭。三十里。過長嶺凡三。短嶺凡四。每登一級。則身一顛簸。共計五千五百五十餘顛。迨出轎少坐。頭昏眼花。莫可名言。嘻。此種旅行。殊極旅行之苦狀矣。泰順黃知事派警察王姓者。來百丈口接余兩日矣。今在途中遇之。乃同行。至三灘稍憩。此十五里中。又顛簸三千二百餘次。行五里。過一長嶺。余以顛簸不堪。又歷一千餘顛。乃步行。約里許。至一高嶺。見懸崖之水潺潺。乃以手巾洗面。覺頗爽快。又行半里。道稍平。乃乘轎。行未一里。又經一長嶺。曰毛洋嶺。高峻殊甚。余在轎中顛簸。凡二千餘次。計共一萬三千餘顛。頭暈甚。惟盤坐轎中。默

數顛。次如老僧之入定。雖驕陽炎熱。不知也。至半陽。離城約三里。爲風雨驟至。雷電交作。乃坐憩焉。余計自四日水行。今日陸行。行路之艱。因可想見。片舟行萬山中。灘河之險。頻經。筍輿歷山路六十里。叢綠疊翠。絡繹眼前。而植物之種類。以竹爲最多。松杉次之。茶楓冬青之屬。又次之。而羊齒類之薇蕨科。山厓岩石間。觸目皆是。有一種小蟲。如蠓。嚙人皮膚。吮人之血。奇癢不可當。余在此五日間。幾於身無完膚。雖隔汗衫。或夏衣。亦能嚙人而痛癢不可當也。兩臂及兩股並面部。均爲蠓蟲所嚙。奇癢奇痛之至。此亦旅行苦狀之一也。道上見有苗民數輩。擔柴下山。婦女束髮於頂。健步寬衣。體力甚壯。健作工。耐苦之態度。一望而知之。有漢民婦女。則髻後挽而纏足者多。惟服務狀況。亦甚勤勞。儉樸之風。一望而知也。見一小童。年甚幼。約七八歲耳。執竹杖以驅牛。見人則讓路。見一十三四歲之童子。擔柴下嶺。體力亦覺甚壯健。總之入泰順境。一種布帛菽粟境象。實爲他縣所不及也。既自半陽行未百步。大雨驟至。於是衣履皆濕。轎底祇有極薄之竹席。不能禦風。

兩也。迨至高等小學校。晤潘耐夫校長。及吳君桐園林君志雄等。略談黃燮元知事來。晤談久之而去。安置行裝畢。晚餐後。卽偕耐夫往縣公署。晤黃知事談。出詩六首視余。詩中有警句一曰。雲壓萬峯低。余卽口占一律以贈之。並用黃知事喜晴原韻。

贈黃燮元知事

昂首雲霄月未明。嗟予浩劫笑餘生。偶來東浙游踪寄。話到南天詩思清。山谷才華欽德政。夷門落拓愧深耕。此間果是桃源境。願鏡當途豺虎爭。

返高小校。編單級教授講演錄兩頁。卽臥。天氣甚寒。蚊蠓紛擾不能寐。兩點鐘後。方入夢。天未明卽醒。寒甚。氣逆作嘔。體頗不舒。

三日晨額覺發熱。身疲倦。氣逆作嘔。早餐後。有潘君福康。字第臣者。勸學所長。擅岐黃術。爲余診治一藥而愈。有潘君芝田。長於文學。來談。

上午九時開會。奏軍樂。泰順教育會代表周君伯至。致歡迎辭。余演說泰順教育。

當由泰順人民擔負發達之職任。縣知事提倡督促輔佐地方士紳。共同進行。尤望開闢山林。振興實業。爲經濟之發展。培植師資。推廣小學爲教育普及之謀。而以苦字誠字恆字等。結束言願行行願言。而以能達言行一致之目的爲歸。黃知事演說官民互助之益。下午講演教育緒論一小時。編講義三頁。吳君來談。言及泰順有苗民。在深山中。雖與漢民同化。然不通婚嫁。婦女之髻在頂。高聳而起。雖暑熱。必以布怕作包頭者。晚黃知事送來詩二首。疊前喜晴韻。

四日晨上午八時。講演泰順教育之現狀及單級教授論。至十時止。編講義二頁。午餐後。偕吳林二君。登萬羅小阜之萬羅亭。此亭新修。昨日黃知事所謂萬羅詩文會卽設此者。

按萬羅寄在泰順城中。萬羅山頂。創自乾隆年間。趙令同治間。地方士紳曾修之。犯呂仙。今自潘君芝田（鎮華）募捐重修。黃知事爲文以序之。因組織萬羅文會。潘芝田君撰聯語一云。山貧不貧。多文爲富。地僻非僻。有仙則名。潘君撰五律五。

章佳句如拳石擎樓閣。世變起蒼狗等皆可誦也。

萬羅亭用潘芝農原韻

俯仰萬山中。四圍佳氣忽小亭。撐一角。大地渺長空。此境登臨勝。伊誰卜築工。當年賢令尹。樂善與人同。乾隆時趙令築亭於萬羅山故名。

幾歷紅羊劫。空留印象名。潘庭梅重修萬羅亭記有云厥象爲印故名印山。

莽墟悲狡窟。世變慨蠅營。唐顧况有莽墟賦。見林鶚分疆集。敢向山靈問。堪徵

仙跡明。亭供純陽神位。箕裘重紹述。新構識吟情。潘君芝田募資重修今亭。

高婉文祥塔。泰順南門外有塔曰文祥。名殊范蠡墩。吾錫五里湖濱有范蠡

墩。山城舒眼倦。繞谷絕塵喧。泰順庫村有錦繡谷。冥想大千境。豪吟不二門。

試聽溪澗水。汨汨有來源。

四顧峯巒秀。茅廬孰臥龍。梅村游有伴。和靖意非慵。時偕吳君桐園林君肖巖同遊。翠黛疎樵樸白雲。遠岫封眼前。叩巖壑共勵後凋松。

浙東旅行記

十二

錫成公司代印

笑我蹉蛇甚。華年去不還。苦中甘冒險。忙裏學偷閒。飽選羅陽勝。環看斗野山。泰邑分野屬於斗。莫嫌樓閣小。萬象足怡顏。

三時半講演至五時半止。晚間蚊蠓紛擾。痛癢不堪。得詩一首。

噉爾么魔直狡滑。嚙人汗血太顛狂。剝膚痛癢何堪忍。揮手翱翔已遠揚。好趁忙中偷腹飽。巧從暗裏借身藏。莫將宵小輕相視。累我頻番苦備嘗。

蠓蟲尤甚於蚊蟲。蚊蟲有聲。而蠓蟲無聲。蚊蟲可見。蠓蟲細小不可見。連日坐臥不安。痛苦萬狀。可恨之至。

五日上午講演兩小時。八時起十時止。編講義五頁。

午後偕吳君林君出南門。行里許。遇登雲橋。聽起水之潺潺。沿溪行。不半里有塔。聳然起。曰文祥。登其頂。凡歷七十二級。四眺風景。南指閩嶠。有峯突起者。曰文筆。蓋福建壽寧縣境。距此僅五里耳。余向吳君轉索筆硯於守塔者。因題一律於壁。出郭南行路不遙。巍然一塔聳雲霄。高攀七級軒眉望。俯揖羣峯舉手招。入耳溪

聲。咽。危。石。羅。胸。星。耳。夢。征。軺。四。圍。山。色。夕。陽。裏。病。馬。孤。吟。氣。尚。驕。

三點鐘至五點鐘講演。編講義三頁。六點鐘至泰順縣公署。應黃知事晚餐之招。是日在座者爲林吳潘林劉潘諸君。閱報知黃知事將調任他往。故是夕多感慨語。返寓桐園携來分疆集一部。爲道咸時林鶚撰。蓋泰順縣自明景泰五年建縣以來。曾有縣志。極簡單。至嘉道時增修。亦不詳。林鶚特編分疆集以補其缺。爲一時名作。耐夫携來羅陽詩始二卷。味義根齋詩稿兩卷。董正揚眉伯先生之稿也。董先生爲嘉慶時泰順文學大家。長於詩文書法。酷有文敏。片紙人皆寶之。余閱此三書。夜過半。猶未臥也。

六日上午演講兩小時。編講義四頁。下午偕肖岩閒步。參觀羅陽國民小學義成小學。下午大雷雨。天氣甚涼。講演兩小時。晚乘涼。微雨即晴。

七日上午演講兩小時。編講義五頁。

余自到泰邑。吳君因余胃病。特備本地麵包。所做之小饅首。色雖黑。尙可食也。下

午講演兩小時。大雷雨。涼甚。晚餐後。補記日記。得詩一首。

羅陽書院卽事

星野占南斗。羅陽撫舊聞。巖疆堪避世。羣彥快論文。一雨添涼爽。雨後涼甚。迅雷掩夕曛。忽驚秋已到。歸思黯江雲。明日爲立秋節。

八日爲夏歷六月二十四日。是日爲立秋節。得詩一首。

此間豔說桃源境。客裏應教歲序忘。薦地秋桐驚一葉。累人愁思寫千行。西風吹夢涼。金井苦雨孤懷憶。草堂畢竟他年真。避世萬山深處待商量。

上午演講兩小時。編講義三頁。聽講員如胡翁陶周諸君。皆泰順之秀也。胡汝羹字良甫。高小教員。翁檉字聖木。縣教育會會長。陶穀字松坪。普育小學校長。周玄字伯至。談話久之。

泰順近代文學家。如曾鏞字復齋。董正揚字眉伯。潘鼎。曾瓚。董旂字霞樵。林鶚字大冲。周觀字麗辰。皆有專集行世。而以曾鏞爲乾隆時之名宿。眉伯霞樵均其弟。

子太冲爲眉伯之外甥。而又受業於眉伯者。麗辰則最近時之人也。

泰順自明景泰時。劃分瑞安平陽之兩鄉。距瑞平之城較遠者。卽今之義翔歸仁兩區也。義翔屬瑞安。歸仁屬平陽。又因山多地曠。盜聚民稀。嘉靖時。設縣治於西隅。與福建壽寧交界處。僅五里耳。總全邑之地圖。自括蒼山分支入境。蔓衍廣袤。南北百二十餘里。東西二百四十里。左隸瑞安。界青田景寧。右隸平陽。界福建之霞浦福鼎福安壽寧。全境東西八十餘里。南北百二十里。所謂閩括間之甌脫也。山中有所謂畚民者。乃苗民之遺。雷藍鍾三姓最多。風俗習慣。與漢人異。不與漢民通婚姻。山多銀礦。在明時屢經開採。因官民互爭。民匪互爭。遂致封禁。如龜伏（赤銅門）石門。下淨水。焦溪等。均有之。鐵沙鑛。到處皆有云。

下午爲蠓所噬。痛癢不堪。人頗不舒。編講義兩頁。晚吳君桐園招余晚餐。在座者爲黃知事及林君志雄。林君肖岩陶君松坪。並桐園之兄旭華。是日太雷雨。晚過欄杆橋小立。見溪水有閘。層層急湍。水聲潺潺。可觀也。亦可聽也。得詩一首。

欄杆橋雨後觀水有悟

宇宙本無極。山水自有情。於以覘動靜。余心試權衡。似水常流動。心聲多不平。似水常靜止。心氣乃清明。此間好山水。古有桃源名。我非避世者。盍名避暑城。四圍山高峻。衆流隨溪行。瀾雲巖谷湧。閃電雷霆驚。急雨狂飆起。新涼習習生。澗水咽危石。但聞奔騰聲。石梁偶小憩。水勢縱且橫。余心不與競。波瀾何由成。觀水貴有術。動靜無變更。由靜而生動。天機活潑盈。由動而思靜。方寸自澄清。此中有覺境。天人相感誠。天性率人性。道源證心盟。慨彼奔競者。日夕徒紛爭。試思川上語。晝夜空怛怛。更作濠上想。文字皆精英。水性悟真理。悠然革心兵。俯仰一醒覺。谷應山同鳴。

泰順之山。圍縣城而四拱衛者。北曰天關山。高二千餘尺。東曰飛龍山。右曰舞鳳山。南曰地軸山。十外有峯突起者。卽文筆峯。已屬壽寧界。中東隅曰仙居山。西隅曰西峯。北隅曰蓮花峯。東城內有赤沙山。南城內有霞山。城之中心則一小阜突

起者曰萬羅山又名印山。

九日上午講演兩小時。編講義五頁。下午講演兩小時。是日午前單級教授研究會同人偕余在羅陽書院同攝一影。劉警佐雄韜字衛羣青田人來晤談。本其兄祝羣之介紹。擬往青田訪劉文成公墓及石門讀書處者。今以時間局促不克往為憾。

由泰順往九都百八十里。文成公祠墓均在九都。離青田一百二十里。石門洞為文成公讀書出處。有瀑布山景佳。離北都一百二十里。離青田城四十里。文成公之後人聚族而居均在九都。約百八十餘戶。距九都二十里有黃莊山名百丈澗。有瀑布九十九丈。聲聞二十里。在九都可聽得瀑布之聲。是晚往欄杆橋聞步。見水碓借水力椎米。一小碓有五臼。每日可椎米五百斤云。

泰順物產

浙東旅行記

十五

錫成公司代印

竹—紙

里光紙

（別名銀紙）
每張價銀
六元

七刀

（凡染色之紙無
論何色均由里
九刀光紙所染者）

質薄
色白

效用

（各校用簿冊本
課及社會普通
用染色紙）

花箋

花箋（普通製者）
翁箋（色稍墨由翁山製者）

楮—紙—綿紙—油紙（用綿紙加以棉紗塗以桐油而成）

杰（秦杰）為泰順特產每斤約小銀幣八角（由景寧產者多）

蕪蛇。性毒大者數尺可以入藥治疥瘡及各種瘡痘均能立愈

龍鬚草。專織蓆

香菰

陶土。能製各種陶器產歸仁鎮大安

磁土。能製磁器 產洪口碗窰

銀鑛。產七洞門者為最佳

鐵鑛。各處皆有以歸仁鄉各處產者為尤佳其製法均以鐵砂淘出鐵質而鎔

鍊之者（鐵質在沙中非用火融焙不能分離砂與鐵之分子故泰順之鐵非岩石中之鐵鑛乃山之表面及河流與平地之鐵砂耳）

煤鑛。甚少聞城區北隅仙居有煤鑛爲某西人於去年來浙東勘鑛者發現云右爲桐園所言者。桐園之兄旭華言及水碓之利。成區有二處。一僅春穀一兼春麥而磨麵。歸仁鎮有一水碓。兼牽橈春麥磨麵三者。竊謂此種天然水力。大可發揮實業。如日本之西京琵琶湖之疏水。利用水力而設機器。凡水力所經過之地。均可以代電力之作用。

黃知事送來羅陽治事錄三冊。屬余爲之序。

九日上午講演兩小時。編講義九頁。下午講演兩小時。偕桐園耐夫志雄聖木等商定在三日內講演事畢。指定學員六人。實習單級教授六小時。分兩日完畢。儘本星期六。余將別泰邑而行。計前後講演十一日。共三十四小時。談話二小時。實習六小時。合共四十二小時云。

晚往勸學所。以舊時三峯寺爲之。圖書館正在籌備。偕桐園訪潘君福鼎。出東門約半里。過弟一流溪聲潺潺。可聽也。橋名永慶。有額曰物生春。橋右爲潘彙長先生之故宅。過橋至潘君宅。晤談久之。

晚翁君聖木攜來地圖一紙（泰順五里方圖）贈余。指點泰邑之山川道路及村鎮。頗細詳。知泰順之水道。分兩大派。一爲飛雲江之上流。曰百丈溪。及龍溪。蓋自百丈口起。至龍門。名百丈溪。自龍門以下。直至飛雲江。則爲龍溪。是爲由西南而東北流之水也。一爲東北而西南流之水。則曰南溪。西溪。也是晚聖木桐園百至三人。夜深縱談。至十二點半鐘。方各返寢室。

十一日上午講演三小時半。而所講之單級教授已畢。午餐後爲黃知事作羅陽治事錄之序一篇。下午三點鐘爲學員之要求。另講痛苦覺悟修養幸福三小時。桐園攜來吾錫鄉先顧南厓先生手書贈泰順董眉伯先生之楹聯一副。錄左。以備余文獻拾遺之資料。聯語云。但看詩草知清節。定有梅花贈故人。

跋語云。眉伯同年詩稿。余得盡讀之。風骨獨清。知其無人之見者存也。茲將出宰大庾。書此爲贈。辛未冬日。弟顧翹。印章二。一爲顧蕓之印。一爲顧南厓三字。題林達菴先生懿行詩。

篠村寄林氏潛德代相傳。孝友根天性。文章紹昔賢。當仁崇烈婦。瘴惡絕魁奸。葦竹千竿影。茅廬高隱年。

十二日招集小學四級編爲單級。視察學員實習。先吳君桐園次林君志雄次高君苴青次陳君志堯前後四小時全體學員參觀。余題出批評之點如左。

吳君授國文四級所見優點

教授次序按部就班各級分配亦見合度

缺點

教音教態微嫌迫促甲乙豫備問答缺班決丙丁揭示範字少教鞭指示板書之字太小恐後列生徒之視線不清楚

浙東旅行記

十七

錫成公司代印

林君授四三年級國文二一年級圖畫所見優點

注重下組詳示畫法教順井然教態穩重

缺點

教音微嫌太低對於一二指示畫法時三四兩久未免空坐久之

高君授算術所見優點

教管兼顧教音爽確教態寬舒

缺點

時間配置稍有不當

陳君授國文所見優點

實物指示頗能引起兒童興味教態活潑教音爽朗

缺點

石與磚未分明教順分量稍欠配置管理有欠顧處

四點鐘開談話會。到者五十餘人。先由余將頃間四君實習之優點提出研究。又由潘吳諸君提出所見。多商榷語。五點多鐘散會。

六點鐘赴潘第臣先生處。招余晚餐。在座者黃知事徐鄭二科長劉警佐吳周潘君等七人。黃知事留余多住半日。作詩酒清談可乎。余謝以戒酒久。黃知事云。改以茶可乎。余乃允之。蓋本擬明日即行。是晚因黃知事索和詩。且謂非和十二首不可。非用原韻不可。故余即夕成之。

和黃知事留別羅陽詩十二首并爲余之留別羅陽同人

笑。墮。塵。寰。冊。九。春。半。生。萬。死。劫。餘。身。儒。冠。早。誤。詩。書。舊。文。化。遲。研。歐。美。新。太。息。人。才。龍。鳳。僞。苦。行。秦。陝。虎。狼。真。年。華。屈。指。知。非。矣。奚。事。勞。勞。奔。走。頻。爲。憐。夜。半。臨。池。險。到。處。荆。榛。狐。兔。猖。不。惜。身。家。廿。年。擲。何。堪。事。業。二。毛。傷。漫。游。南。國。題。鴻。渚。歸。隱。西。神。問。雉。梁。臥。病。春。風。三。月。暮。驚。聞。戰。禍。北。都。倡。聞。道。浙。東。風。景。好。願。偕。山。水。訂。同。盟。雁。湖。絕。頂。擬。仙。境。鷺。嶺。三。峯。躋。上。卿。江。渡。飛。

雲。心。共。遠。灘。爭。急。水。石。磨。平。夜。深。百。丈。溪。頭。過。巖。峻。高。卓。有。名。晨。光。啼。破。曉。雖。荒。蒲。飯。籃。輿。囊。午。糧。到。眼。煙。燴。堪。繪。影。撲。眉。雲。氣。助。吟。章。羅。陽。百。里。峯。千。疊。巖。邑。羣。英。話。一。堂。筆。舌。餘。閒。偷。酬。酢。酒。狂。不。署。署。詩。狂。斗。城。文。獻。孰。支。持。三。百。年。來。往。事。思。理。學。復。齊。傳。嫡。脈。豪。吟。眉。伯。重。當。時。迄。今。風。雅。非。無。主。依。舊。增。場。會。有。期。聞。道。此。間。執。牛。耳。賢。侯。政。教。自。兼。施。民。事。綱。繆。計。萬。全。厚。生。利。用。植。心。田。邊。隅。永。固。防。金。革。庠。序。年。聞。納。俸。錢。花。落。訟。庭。閒。可。數。桑。栽。平。野。影。森。千。巖。茶。山。竹。天。然。產。文。告。通。衢。改。進。先。新。交。覲。面。賦。將。離。兩。載。剛。逢。瓜。代。期。父。老。馳。文。攀。北。轍。使。君。健。筆。寫。秋。思。愁。腸。十。二。迴。環。誦。化。雨。三。千。攻。錯。資。山。谷。詩。名。傳。楚。越。洛。陽。爭。覩。更。無。疑。弧。矢。原。來。志。四。方。客。中。舊。學。快。商。量。言。疎。行。拙。漸。夷。監。政。簡。形。清。頌。子。桑。莫。問。風。塵。多。歷。碌。且。評。李。杜。孰。優。良。迅。雷。疾。雨。思。潮。湧。酬。唱。連。番。較。短。長。白。戰。何。妨。步。步。營。倚。裝。差。喜。未。成。行。萬。羅。亭。畔。雲。無。跡。百。丈。灘。頭。水。有。聲。主。客。不。

嫌詩境窄。官民合力。幕巢擊斯邦。風俗真淳樸。大好山城事。耨耕愧無壯。悔文思湧。竊比宗文臥。覽詳旬日。指揮勞筆舌。幾人知行盡。圓方惟將教。學期相長。共勵着我語。有章同志。漸多希望。足萬峯高峻。水流長。兒童心性本天成。扶植良能自在行。此理果明憑苦覺。寸心得養謝虛榮。滿階草綠添生趣。一葉秋驚客。遠程說到羅陽新。教育修途珍重別離輕。君向西湖我歸錫。舟車迅疾擬雲騰。驕素志慨難逞。雲鳥倦游病未能。足跡猶思繞寰海。世途不復卜除乘者。番一卷羅陽記。嘯傲新篇匝月增。

十二日上午黃知事來。余以羅陽治事錄序及和詩十二首贈之。黃君酬余以浙東旅行記序一篇。是日上午羅陽同人開送別會。先由潘君芝田致送別辭。繼黃知事演說。余以有恆心三字策研究會諸君。並組織永久之研究會。出研究雜誌。及出外參觀等事。希望同人。又以時地人三字演視振興實業。普及教育。到會者七十餘人。散會後。同人以扇頭及聯屏等索書者十餘人。有平陽金鄉與余同姓。

字振鏘者。名斌。在羅陽任巡警。以扇頭索書。即口占二十字以應之。吾族溯三晉來。從小子侯。遠宗千萬星。猶是溯春秋。爲潘君伍撰聯語云。笑我浮滄海。看君住挑源。少頃侯斌送來木根製壽星一座。固辭不獲。乃受之。有葉躋卿名陞者。壽甯犀溪小學教員。來聽講而未及。僅取去講義一份。索書扇頭。口占二十字以應之。聞越巖疆士來游。旬日遲不堪。空手去索寫老人詩。爲桐園撰書聯語云。大地多林壑。此間疑桃源。書寫半日後。爲黃吳兩君畫竹兩頁。下午黃君邀余兩次入署傾談。閱曾復齋文集詩集。文固本理學淵源。而發爲文章。自與衆不同者。詩亦情性真摯。氣息深厚。晚餐後。閱黃君詩稿百餘首。而五律古茂可讀。時潘芝田君與黃君及余倡和。得詩三首。余倡二首。潘黃兩君和之。三人聯詠一首。錄左。

半日滯行迹。黃昏燈火親。關山皆主客。風雨渡河津。勸酒情殷摯。烹茶意率真。旁觀休竊笑。我亦局中人。

酒後閒情適。茶餘逸興佳。多君絕塵境。慨我尙天涯。夜雨燈花夢。秋風桐葉懷。此

間得知契。談笑任莊諧。

斗城半日爲君留。驥數首新詩紀客游。芝風雨故人肝胆語。變乾坤樽酒別離愁。驥縱教行跡如蓬轉。驥却喜間情似竹幽。變最是詰朝揮手去。驥一天明月萬山秋。雙

縣署有挹翠亭。余有句云。挹得衆山翠。翌然聚一亭。晚風吹過處。修竹好同聽。夜十一點鐘。返羅陽書院。又爲肖岩耐夫聖木等寫字畫竹。爲志雄畫竹。後撰一聯語。書之云。名利淡秋水。藏修看白雲。偕吳林翁林諸君談至夜深而臥。時已三點鐘矣。

十四日晨起。縣署派警察二名。來護送余往百丈口。一侯斌。一董某。耐夫贈余茶葉香菰。桐園贈泰順產紙標本。及鐵鑛之砂。黃知事贈余孝感詩徵等。七點鐘辭桐園志雄小岩聖木耐夫諸君而行。乘轎四十里至司前。往陶宅。陶君松坪與夏君景高字作成者。迎于門外。入室久談。午餐後。往觀迴瀾橋工程。參觀松坪所辦

小學一所。校長松坪自任。校名義翔普育學校。昔爲兩等。今僅國民小學。學生四十二人。教員四人。年支三百二十元。陶氏獨任之。附設蠶桑補習科。學生十餘人。年支一百八十元。由縣署補助之。陶清宇主任。蠶業畢業者。松坪復偕余游覽山水古蹟。有池村八景。指示鰲嶺。龜井。下庫寨。金雞洞。箭坪。石門。君子潭。菊花井等。有石坊一。乃松坪之母之節孝坊也。閱可自怡齋詩鈔。爲陶駿著。乃松坪之伯父遺稿也。松坪贈余以董眉伯先生墨蹟小軸。余愛不忍釋。松坪則以乃父行狀請余填諱。且乞余爲之傳。余諾之。

是日可記者有三事。一迴瀾橋之工程。以陶氏三世祖孫父子兄弟之功。而成此三十五丈長之大橋。昔日一萬五千餘元。合之今日之工程。須三倍之。非五萬千元不辦。可見陶氏之功德在民矣。此一事也。是日別松坪行未數里。風雨驟至。冒雨行二十里。衣履盡濕。少頃天黑道滑。山嶺高峻。與夫遲遲不敢前至一村。索燈火。無處購備。幸警勇侯斌。往近村數里間。購得燈火。借燈籠二。始得冒夜雨。行路

十餘里。而至百丈口。回首思之。彷彿十年前黔山夜行之情景也。此一事也。余參觀普育小學時。見董眉伯遺墨。破碎不堪。懸於教員室中。余愛之。松坪即慨然贈余。此又一事也。此三事不可無詩以記之。

迴瀾橋

百道溪流來閩嶠。衆山缺處鎖長虹。鴻工建築積三世。力扼狂瀾不敢東。

夜雨山行

筍輿夜黑山前阻。蠟炬村虛客尼行。十里峯巒煙雨裏。崎嶇冒險不勝驚。

董眉伯遺墨

羅陽詩社稱眉伯。遺墨民間今已鮮。一幅煙雲猶是舊。慨然贈我謝陶潛。

是晚既至百丈口。舟子索價甚昂。嗣賴侯斌爲余雇定舟人之價。下舟偕侯斌夜宿舟中。侯斌索余指畫指書。得詩一。

夜泊百丈口

浙東旅行記

夜寒一棹停江上。聽盡灘流汧汧聲。此去雁湖眺勝景。千峯爽氣月初明。

十五日晨侯斌去。余給以銀幣一元。另給董某六角。開船順灘而下。日行一百四十里。夜行六十里。曉行四十里。途中所見風景甚多。可記者如一路飛瀑之多。適在雨後。故共見有三十餘處。其尤者五六處。均四五丈。及三十餘丈不等。恍然于唐人山中一夜雨樹杪百重泉之句之有由來也。自百丈口順灘流行。一瀉而下。其險比上灘時爲尤甚。蓋曾經數灘。高下四五尺。一舟冲至沙岸。船首入沙數尺。一舟重載柴薪。傾覆於水。余舟屢歷險而幸未覆舟也。

十六日即陰歷七月三日。星期一也。十點鐘到瑞安。至泰順商務公所。付船資三元。少坐。即偕高伯鴻。高魯青。同遊瑞安西山。登文昌閣。參觀瑞安縣立圖書館。俯瞰清城屋宇。頗見稠密。東望一塔。高聳龍山之頂。西城之隅。亦有一小石塔。形家所謂風水。必以雙塔對峙故也。是日爲休息日。故館中闕焉無人。所謂掛圖室中。僅中國地圖一幅而已。藏書室二。有書櫥各五六。女子閱書室。青苔滿室。有小桌。

二。男子閱書有長桌一。可坐六人而已。而館長室中。几椅皆無。知塵封已久。會計庶務書記室。有瑣局門。兩箱有懸字畫數軸。甚古雅。一爲少翁摹誌。李叔同題。此係沙翁親筆。渾穆古厚。文室亦古奧。不可猝讀。姑從最近英文譯意。下有英文數行。乃李叔同所譯者。不暇錄也。

又有一軸。即古埃及王后之造像也。考其時代。乃埃及五千年古王及王后之像。旁有呂碧城藏。李息霜題字。旁視壁間。又見甌隱園尋書圖。冒廣生題。又見一室中。懸李陽冰篆。縉雲城隍廟碑文。蓋昔日李陽冰曾宰是邦也。

觀此可知館長爲一好古者。惜未謀面爲憾。時一館役自外入。因詢及此間職員何人。因言及館長爲薛鐘斗先生。會計庶務爲孫先生。夏先生。掌書員爲喬先生。詢其閱書。每日有幾人。答以多則五六人。少則三五人。瑞安城中所見學校。有縣立高小一。區立國民四。法象女高小一。縣立毅武女國民一。區立毅武女國民一。區立毅武女學。初三四年生三十一人。二年生十八人。一年三十餘人。幼稚

生三十餘人。瑞安南門外。市面甚熱鬧。城中如東門大街。店家多大鋪戶。房屋亦高大。地方風俗。與永嘉有相似。地方廟宇佛寺固多。惟破碎者甚多。瑞安文學。夙昔素著。如黃體芳父子。一爲江蘇學政。一爲湖北學政。學界之人。至今欽仰若山斗。惜其後人今無著者。午後乘輪船赴永嘉。舟資兩角四。故在舟中無事。補記日記。並將途中未成之詩續之。自百丈口至灘峽。百二十里。重灘險阻。一瀉而下。得記事詩四首。

萬山。雷。雨。深。宵。遇。百。道。重。泉。掛。樹。多。試。向。厓。前。聽。汨。汨。自。成。溪。澗。自。江。河。聞。道。重。灘。百。廿。里。舟。行。最。險。是。三。溪。我。來。往。返。輕。颿。渡。祇。聽。奔。騰。萬。馬。嘶。扶。桑。觀。瀑。稱。奇。絕。霧。瀧。飛。泉。雲。水。中。驟。見。此。閒。三。百。尺。萬。峯。深。處。亦。稱。雄。風。吹。馬。尾。散。如。煙。轉。側。峯。巒。態。異。前。刻。意。慕。臨。渾。不。似。枯。毫。笑。擲。看。飛。泉。輪。船。至。永。嘉。小。南。門。外。有。浙。東。旅。館。接。客。者。因。乘。小。船。入。城。寓。浙。東。旅。館。遣。館。夥。往。縣。公。署。三。科。請。包。君。翔。仲。來。旅。館。少。頃。包。君。來。言。及。有。同。鄉。徐。懷。清。卽。公。美。之。

兄在此由華蓋山墜下。傷腦及頭部。險甚。君之游山。雖具冒險性。凡事必須謹慎也。余告以擬由永嘉往樂清。游雁蕩。包君言須空身行爲。是帶行朱。恐不安。余因思託包君將現款換鈔票。較輕便也。訪梅挹芬於維新書局。未晤。因往府學巷訪孫君幹甫。晤談少頃。孫君即約往別有天晚餐。余以永嘉風景。以飛霞洞爲第一。擬先一游。即偕孫包二君同行。出小南門。至飛霞洞。樓閣數重。洞天一穴。最奇者。爲一臥樹。蜿蜒若臥龍。大有神龍見首不見尾之象也。聞託根在東山之上。盤根錯節。天矯臥行。至此洞天。僅觀其半。已覺周約數圍。而偃臥穿過。重樓兩重。而昂首於洞外。山厓之前。殊可觀也。洞爲一碑堵住。不能入。洞外另有碑。大書謝客碑三字。以謝靈運昔曾守是邦也。瀑闌遠眺。煙景迷離。暮色中雲樹蒼茫。別饒佳景。西厓有一亭。翬然高臨。以時太過。未登眺也。下山行。返城。至別有天茶話。及晚餐後。又往維新書局。訪梅君未晤。即返旅館。與包君久談。並託包君將泰順帶來之款百元。先由中國銀行匯錫。並定明日先往樂清。游雁岩。仍返永嘉。乘海宴船返滬。

可與包君同行。包君去後。即收拾行李。分兩箱。一寄幹甫處。一自帶行。時已兩點鐘。乃臥。

十七日晨起作飛霞洞詩兩首

永嘉好風景。第一數東山。林壑霞飛赤。洞天夕照殷。豐碑摩謝客。煙景鎖松關。曲折迷重閣。憑欄一嘯還。

此間最奇景。臥樹若龍蟠。天矯穿樓閣。堅貞歷歲寒。託根疑上界。昂首入雲端。倘化神虬去。翱翔江海寬。

孫幹甫君來。即將小提箱一。及衣包一。寄存幹甫處。以備游雁岩回來。再由溫行也。蓋聞大荆至海門之路。甚偏僻。且不靖。十點鐘。包君來。同往東門外護商局。訪無錫同鄉陳龍文。晤談。方知爲陳伯秀。昉之子。其弟郁文。少時曾肄業於吾家中。九年前之尋常高等小學校者。今郁文亦在此間也。聞余即往樂清游雁蕩。即留余午餐。陳偕包君同送至船埠。趁航船。包君陳君向船戶言明。立刻開船。少載搭

客。余出舟資二角。蓋普通人趁船者。每人僅銅元三枚耳。自溫州趁航船。至館頭。舟行甌江中。約三十里時。一點鐘開船。三點半鐘到館頭。舟中遇有郭姓母子。亦往樂清者。因同雇一小舟。四人同坐。往清樂。價六角。郭姓業鞋業者。其表兄趙姓業農。其母曾在煙臺。故余之語言。尙可通。吾輩行路。到處遇有奸人。亦事之巧者。夜九點鐘。將至樂清城。舟子不欲進城。謂送之東門外。可以登岸。郭姓母子與趙姓者。將舟子大爲申斥。以爲舟子欺人太甚。舟子始首肯。送余至一周姓之悅來客棧。晚餐。以盤託來看饌六色。其酸腥惡臭者。凡五色。僅有豆燒肉丁尙無惡味耳。因問有雞蛋否。曰有。乃令煮蛋湯一。勉佐晚餐。舟子已給舟資。又來索酒錢。語言不通。道路生疎。行路之難。可見一斑。聞周姓棧主。言省視學到此。年凡一週。學校有送川資及轎資或僕費等者。縣視學陪同往各校一周。數日卽去。現陳姓省視學不知尙任視學否。余答不知。蓋周姓疑余爲省視學也。其何以疑余爲省視學。則見余攜致勸學所長鄭漢由。縣視學李哲。兩函。詢問鄭李二君之住處故也。

余因告以余來游歷雁山者。非視學也。且告以吾江蘇省視學無受人之一錢者。十八日晨起早餐後。往樂清勸學所。以李君蓉川之紹介函。晤所長鄭漢由君。以林君志雄之紹介函。請李君子溫來所。由鄭君介紹朱君味溫。莊君松坡。來談雁山路徑。李君子溫來所坐談久之。卽往周悅來飯店。將行李搬至所中。又偕朱會長李視學同游西山諸勝。於是盡兩小時半之力。遍游白鶴寺。二公祠。觀瀑亭。以及瀑布飛泉。山潭印月等風景古蹟焉。午餐後在勸學所演說兩小時。略講菲列賓小學教授之可法。及今日教育之趨勢。歸結到余之痛苦教育。至樂清地方教育須士紳共負責任。自可日見發達也。是日聽演說者四十餘人。

偕鄭君談悉樂清教育狀況。人口三十三萬餘人。樂清縣境東西二百里。南北八十餘里。教育費統計一萬二千元。學校數。縣立高小四校。城區一鄉區二。女高小二。區立高小一。私立高小一。學生共四百四十人。經費共九千四百元。國民學校區立私立共一百六十餘校。區立約三分之二。私立約三分之一。平均學生每

校五十人。共七千餘人。經費區經費兩萬元。經費補助費五千元。

參觀通俗圖書館。經費三百元。館長洪昱。圖書二百六十餘種。閱書者平均每日四人。博物標本四百餘種。儀器數十種。另有書二百餘種。爲洪君叔翰所捐。閱報所。每日閱報人平均二十人。

公共體育場。主任周趙莘。每日入場運動者。平均十餘人。

參觀樂清平民習藝所。所長施震澤。經費二千元。藝徒習藝者四十五人。木科。蓆科。火食由所給。定額四十人。木科二年畢業。蓆科一年畢業。每年出品千餘元。售出五六百元。

通俗演講所。所長講演員二人。經費常年四百元。

樂清物產。有蓆草一種。產東鄉虹橋。以蓆爲經。以草爲緯。其他產品。無大宗之物。則不足以贅言矣。

往縣署中。訪常州同鄉劉祖錫知事廣伯。略談卽出。三科助理徐君來談。少頃卽

去。劉知事來晤談不久卽去。

朱君味溫莊君松坡言。樂清城之周圍約百里。南北三里。東西二里。附郭戶口三千餘戶。學校高小一。女高小一。國民十。學生總數六百人。

白鶴寺。創於晉張文君死後。以住宅捨爲寺。

二公祠。張公晉高士。蔣公名埴。清之賢令。

樂清風景雖亦不多。然亦有所謂八景者。(一)瀑布飛泉。(雙瀑由厓上飛下。)

(二)山潭印月。(東山塔影每於中秋映入橋下。故名塔影橋。橋在西山之麓。)

(三)東塔煙雲。(東山有塔。高沒煙雲。)(四)白鶴晨鐘。(卽白鶴寺之鐘聲也。)

(五)紫芝晚磬。(昔有紫芝寺。今已圯。)(六)雲門福地。(七)西岑松雪。(卽西山。)

(八)蓋竹洞天。又有觀瀑亭。爲常熟狄令所建。對澗而立。聲潺潺入耳。約高十餘丈。

朱莊二君言及雁蕩之勝。如北斗閣。靈岩等。大龍湫。雁湖芙蓉之名。而雁湖在山

頂人迹亦罕。聞今已無水。僅有蘆葦滿湖耳。

赴雁山之路。一自大芙蓉。走虹橋。由南而北。一自大荆鎮。由北而南。今欲由南而北。則走北斗洞。然後往二靈游。觀瀑則以面石梁。及大龍湫梅雨亭數處爲最云。觀瀑亭。

忙中偷得幾分閒。觀瀑來尋空谷間。白練雙飛亭一角。悠然相對足怡顏。未到雁山觀瀑布。先來鶴寺聽泉聲。幾多名利銷磨盡。稜石圓平潭水清。

和劉久安觀瀑亭韻

太息世蒼狗。紛然狼虎爭。伊誰胸落落。隔此水盈盈。空谷鼓聲震。當前金石聲。一亭峭相對。岩壁捲書城。（捲字改積字亦可）

爲鄭李朱莊四君指畫竹四幅。夜談久之而臥。是晚李君子溫已爲余雇定游山轎一乘。言明每天一元一角。劉知事派來法警一名。能通普通語者。爲導游。晤陳篤周略談。知爲勸學所之指導員也。去年曾往錫參觀者。

浙東旅行記

二十六

錫成公司代印

十九日早餐後七點鐘。乘藤轎一。別鄭李朱莊諸君而行。余向鄭君借樂清縣志數冊。在轎中繙閱之。得吾邑鄉賢鄒迪光大龍湫記一篇。另紙錄出。知大龍湫瀑布爲雁蕩山瀑布之最奇者。

行二十里。過竹前又十里。至虹橋。停憩一小時。轎夫等午餐。余亦略食。共付餐資四角。虹橋一鎮。爲樂清全縣最大之市集。不僅爲東鄉之大鎮。而人煙稠密。市廛櫛比。似較城中勝也。有警察分所。有高等小學國民學校等。市上士商往來之人。亦衣冠整齊者。

午餐後。卽行二十里。過一海灣。用舟渡海。渡名清高渡。行二十五里。至白溪鎮。三面皆山。東臨大海。白溪由東北來。游自雁山出。行十里。入雁山谷口。卽白溪口。迎面一山。曰響嶺。有一橋。曰響嶺橋。南去。卽往靈岩之路。北行。則高山阻於前。疑無路。可通。有石腔。峒如屏。嶂筍與沿山。東行得一石徑。北繞山峽。突見雙峯插天。輿夫曰。此蠟燭峯也。不知此爲雙筍峯。對面有一峯。如一老僧披袈裟狀。奇甚。輿夫

曰。此金雞峯也。澗水潺潺。兩山對峙。處有一石橋。橋之西山麓。有一亭。爲新建者。額曰靈峯第一。亭蓋此靈峯之山麓也。入谷行里許。有澗曰鳴。至溪通白溪。有峯曰連雲嶂。由聽泉巖側曲折行。登北斗洞。多山厓。洞外卽見雙筍峯。高插雲表。入洞門。見有泉點滴可聽。蓋由厓上滴下者。俯視之。清可鑑人。入客堂。有老道來迎。客至樓下客座。有客携一童飲酒晚餐。彼此道姓名。始知卽蔣君叔南也。蓋余在滬時。托張雲需君所紹介。及寄贈余之西秦記。蔣君固早知余之來游矣。余亦快甚。相與縱談。且晚餐餐畢。卽由叔南導游東內谷諸名勝。一路山行。指示前後峯巒之名。如伏虎峯。金雞峯。靈峯。犀牛峯。天冠峯。雲板洞。聽泉岩。碧霄峯。孔雀岩。仰天鷲將軍洞。千佛岩。背面觀音。朝陽峰。礪齒峰。鬪雞峰等。東行半里許。暮色蒼茫。中見碧霄峰之北面。又曰戲獅峰。余偶一瞻視。恍見一佛面形。下視如魁梧奇偉之身軀。余因名之曰佛面峰。此移步換形之山峰變象也。一因視線之關係。一因暮色之籠罩。故現出種種奇狀耳。登山行數十武。回首靈峯缺處。忽見半環新月。

透露缺處之正中。其景象之奇。真有天造地設之妙。余因名之曰月環峰。又行數十武。天黑道崎嶇。煙榛石級中。不勝步履矣。遂返北斗洞宿焉。夜坐憶及本日過某嶺。見大海環於東。隔海有山甚多。輿夫謂卽玉環山也。時氣候炎熱。口渴欲求水飲而不得。乃得句云。舉手擬招雲蔽日。張唇欲喝海爲茶。忽看水面泛顏色。風捲湖平搖落霞。隔海玉環連嶂亘。當前響嶺聽泉鳴。石橋一道山腰臥。疑是長虹天上橫。奇峯突兀不知名。轉側移形舉步更。覲面疑爲山路斷。豈知曲折道分明。

爲北斗洞道人畫竹偶題

竹影扶疎處。修竿聳碧霄。試從門外看。雙筍隔峰招。奇突不知名。轉側且縱橫。欲向山靈問。但聞碎石鳴。

靈峯

山不入深佳處。少月從破嶺。半環懸試聽。碎玉錚鏘響。此是靈峯第一泉。

金雞峰

初見疑爲僧拜石。回頭又作笏。朝天豈知日出。金雞曉。昂首雄冠獨向前。

獻獅峰

一驚仰天聳碧霄。剎那獅子戲峰腰。此時忽得新形態。暮靄迷離佛面描。

夜宿北斗洞

百里探奇境。雙厓覆洞天。高談逢蔣詡。選勝笑青蓮。相傳李白未曾到此。雲聚山多。雨宵寒客擁棉。一聲清磬響。驚起老龍眠。

二十日晨早餐後。即偕蔣君父子游山。別老道給以輿夫等飯資一元。先游羅漢山。即觀音洞。觀音洞三字爲同治間吳江金枚隸。歷三百七十七級。至大雄寶殿。當雙筍峰之前。和尚烹茶餉客。聞蔣君云觀音洞。在合掌峰下。又名一線天。有一縷泉。洗心泉。均在大殿最高處。有最上一乘之題厓。摩厓題字甚多。相傳秦檜有觀音洞碑文刻石。書法甚古。遍尋未見。大約在佛座後。出洞指五老峯。高列西

山之嶺。山之腰。爲南碧霄洞。南碧霄洞。舊名雪洞。北碧霄洞。洞上爲依天嶂。游南碧霄洞。洞中有唐開元二年之太守夏起伯到山之題厓。宋人題厓甚多。今人題書者佳句殊鮮。惟傅沅叔先生題句尙佳。余因用其原韻。題詩一絕。

題雪洞用壁間四川傅沅叔韻

洞外奇峰石亂橫。碧霄南北助吟情。仰天儘有驚人句。不敢漫題問衆生。

出洞行數十武。蔣君指示蟾蜍石。在超雲峰下。峰下有半月洞。至照膽潭。潭水深藍色。有象牙峰。長春洞等。過石橋。見橋下潭水。約深二丈餘。聞中有大鰻魚。水愈深。故色愈藍。所謂照膽者。亦祇極言其深耳。蔣君父子先行。余乘轎往謝公嶺。此嶺爲東內谷與東外谷之交界處也。過謝公嶺數里。即下轎。至一矮嶺。東望接客。客在樹林蔽隔處。尙不甚清楚。因曲折前行約半里。望見老僧接客。峰其形狀之畢肖。真一僧昂頭合掌而立也。奇極。奇極。返過謝公嶺。乘轎行約四五里。即至響嶺橋。下轎偕蔣君父子同行。過朝陽嶺之麓。有朝陽洞。馬鼻岩。即昨日余所謂雁

山第一峯也。過石橋向西行。途中奇峯突兀。名勝絡繹。指不勝數。擇其尤者而記之。如睡猴峯。將軍峰。鳳凰影。三折瀑。望海岩。至旗峯。龍頭岩。開元洞。蓮蓬峯。蝙蝠峯。馬尾瀑。伏牛峯。金鼎峯。蓼花嶂。老猿披衣。游絲嶂。靈鷲峯（即鷹峰）等。而老猿披衣之一峰。尤爲奇絕。蓋一大圓石。頂於一峰之上。眞如猿猴披衣拱手而立之狀也。五里入淨名寺。寺爲乾隆間道融和尚得朱士彥相國之助。大啓宏宇。惜今已殘廢。房屋亦凋敗。寺傍鐵城嶂。寺中有李石農之墨蹟。止觀堂記。有一聯云。名山招五嶽。以外精舍在。二靈之間。亦李石農書。又有張友柏聯語云。香界三千應聚此。奇峰百二自飛來。書法亦佳。下聯蓋本於雁山百二奇峰也。蔣君言昔日伊曾在此讀書三年。今至此不勝今昔慨矣。有大鐘一。擊之。砰然發大聲。震動山谷。臨行題一詩於壁。

淨名寺

寺古壁生蘚。鐘宏聲徹雲。此間一小憩。淨境絕人羣。

西行經翠薇峰。蔣君云。此間昔有翠薇亭。今廢。過響岩門。以響岩之石叩之。有聲。故名。行里許。見二仙岩。所謂二仙談詩是也。又前行卽雲霞峰。有霞峰洞。雪花天響岩潭。最奇者。崖上飛瀑。約十餘丈。迨至中間。散作雪花。迷漫紛散於空中。近厓下。過如雪花之亂撲。仰首視之。顏面如着寒雪。衣服皆濕。離此數十步。迴望之。眞如飛雪滿天也。此種奇景。殊足增我旅行之好資料矣。得詩一。

雪花天

昂首厓前看霞嶂。水花噴散亂晴空。如何六月猶飛雪。料爲人情太熱中。

過此則爲三台洞。龍王洞。虎口岩。珠簾水。自北斗洞起。至靈岩。約十餘里。卽至將至靈岩。有鐘岩鼓岩。爲靈岩之門戶。下有一石梁。澗水冲其間。其聲可聽也。遙望二鯉峯。西有聽詩叟。其狀甚奇。彷彿一老人。側倚峯頂。傾聽者。然前行數武。蔣君指示頂珠峰。僧拜石。紫霄峰。木魚峰。玉兔峰。大獅岩等。而靈岩在望矣。東岩西岩。分列左右。岩勢鬱奇。塊然橫阻。者卽紫霞嶂也。木魚玉兔大獅拱於右。僧拜石之。

兩峯撐於左。天柱一峰撐於前。接客峰又在其左。前行不半里。諸峰又變其形狀矣。靈岩禪寺居於中天柱峰在寺之右。高聳天際。寺之左則有甚薄甚高之一大石片直插雲霄。蔣君曰。此展旗峰也。既至寺前。則叢林修竹。碧擁寺門。入寺則殿屋傾欹。佛像倒塌。絕無僧道主持矣。蔣君曰。寺已爲同人購置。（蔣君與潘君等）并購寺中山田數百畝。現正在此改築也。乃相與穿寺之西。而探龍鼻洞之勝。崎嶇而上。蔣君北指奇峰橫列處。曰錦屏峰。側面望之。又是一形。曰插龍峰。下即龍鼻洞。而停踪遠望。蔣君指示峰下。若一西洋美人狀。長身鶴立。而手牽一犬於身之右。冠帶衣裙眉目。皆宛然者。曰此種肖象。無以名之。謂之美人峰。又前行。西南有雙峰突起者。曰雙鸞峰。左接玉女峰。含珠峰。捲圖峰。獨秀峰。卓峰。筆旁。爲臥龍澗。有小瀑布潺潺而下。名小龍湫。由西而北行。拾級而上。有天開圖畫四大字。題大石上者。蔣君曰。此朱子所書也。北有高峰。雙峙雲表。約數千尺。上架石梁。曰仙人橋。余與蔣君登四百餘石級。而至龍鼻洞。洞頂爲插龍峰。自洞頂蜿蜒而下一

爪懸空。其狀甚奇。舊有龍鼻下垂。厥形如匏。水自鼻孔流出。故又呼之曰龍鼻水。同治間。爲人敲剝龍鼻中之結晶物。致日事剝毀。致鼻已損壞。而爪亦漸損傷。故今蔣君等築石於前。以蔽護之。水自厓上滴下。以缸承之。余掬而飲。水涼沁肺腑。厓壁題字甚多。有唐宋人磨厓。可寶貴也。如寰中絕勝。海上名山等大字。見吾錫同鄉許君溯伊鄒君仲丹題名。知許君先我游此。我愧許君矣。出洞南行。折而東。至屏霞廬。爲蔣君之別墅。廬憑白雲岡。西恃安禪谷。谷爲靈岩開山僧神照所居。登仰高樓。祀蔣君之太翁燧雲先生之神位。張寅恭跋。蔣君之兄仲冕。名希同。文字亦佳。惜早亡。蔣君有弟曰季哲。于役都中。母年六十七。甚健。聞客來。入廚爲炊。出肴饌。不豐而潔。午餐後。流覽風景。樓上兩室。窗櫺四啓。奇峯怪石。絡繹不絕。可憑欄望。可臥游也。題詩一律。以贈蔣君。

題屏霞廬贈蔣叔南

曲折入幽勝。靈岩列錦屏。天開三徑畫。人在九霄青。玉柱鸞峯聳。冰泉龍鼻冷。敢

將題俚句詩叟怕爲聽。

蔣君別墅中最佳之風景。在窗之南面。展旗峰與天柱峯雙峯分列於窗之左右。如昨晚在北斗洞憑欄望雙筍峰也。兩處佳境。難得此天然形勝。非人力所能造。蔣君得此幽勝。爲奉養老母起居。真山中人。最得清福者矣。午後蔣君父子偕余同游天窗洞。披荆斬棘。拾級攀雲而上。約五百餘步。至一洞。兩厓密合。中有一甚狹之石縫。從縫口入洞。鑿石爲級。漸登漸寬。並肩而上。能容二人。石壁有斷碑題名。讀之知爲至元間始闢此路。登其巔可容三人。一窟當前。探首俯視。則杳渺穹窿。深且數十丈。迎面上下。兩大天窗。仰而視之。右側一峯。峰外亦有一窗。洞周圍皆峭壁。厓石中有此三洞。上蓋石厓。下臨無地。天光從大窟中來。此中尙有何境。此外尙有何景。無從揣測。但從窗洞中可見山光。送青回首來路。則一線迢迢耳。是誠奇觀矣。

返靈岩寺。別蔣君父子而乘轎行。一路向南。有大屏峰。觀音峯。甚高峻。約二千數

百尺。觀音岩。一曰玉霄峯。行二十里而抵馬鞍嶺。途中輿夫指示板屏岩。貓岩。鼠岩。五指岩等。下轎步行。登馬鞍嶺。崎嶇曲折。約五里而至嶺頭。天熱氣喘。坐大石小憩久之。黑雲上擁。疑有雨。乃急步下嶺。久而至山麓。翹首西顧。重巒疊嶂。一望無涯。回顧馬鞍嶺。高屏於東。蓋此嶺爲東內谷與西內谷之分界也。於是乘轎行不半里。曲折入山。適逢大雨。淋漓盡致。道滑泥濘。乃下轎步行。少頃雨過。迎面一峰。尖又雙秀。疑爲剪刀峰。詢之輿夫。果然。行里許。直至剪刀峰。仰而視之。眞如剪刀之雙開。轟聳雲表。環剪刀峰而北行。屢顧此峰。幾有步步變幻之態。忽而風正一帆。進行飽滿。忽而天然一柱。獨立巍峨。忽而如石屏如玉筍。所謂移步換形之妙。其在斯乎。使非親歷其境。不信造化小兒。竟能弄此鬼斧神工。變幻莫測。令人驚奇駭特之甚者。

峰迴路轉。前後左右。峰巒紛擁。如大插屏數十架。高且數十丈。忽聞碎琮淅瀝。其聲如風。雨夜至如碎玉粉屑之撒地。如飛泉之噴石。如怒濤之遠去。如夜潮之徐

來忽遠。忽近。忽大。忽小。忽奔騰。如萬馬疾走。忽瀟灑。如竹風捲葉。又如雪霰之輕。着於平地。又如落葉之乍墮於空階。昂首視之。則大龍湫之瀑布。即在目前矣。屏息駐足。望之如馬尾之風吹。如珠簾之曉垂。如霰玉之噴散。如雲霧之四飛。自上而下。如游龍之夭矯。而舞影如白雪之紛飛。而鋪銀。其在十丈以下。則猶如霧雨之迷漫。空際。其在二十丈以下。則散而爲煙霧矣。俯視一潭深碧。周圍且十餘丈之寬。所謂翠被石瀑者是也。坐石久之。流連忘返。較之廬山瀑布。石門飛瀑。有不

可以道里計者。對面有觀瀑亭。已圯。有審言來此四字之碑。庸時之金石也。吾邑鄒迪光先哲曾有游觀大龍湫記。形容瀑布之奇。余始讀之。猶未之信也。今既觀此奇境。愈信造物之奇。地理上天然勝境。非有文章之妙。不起以寫之也。由大龍湫出。仍由剪刀峰北而東。由東而南。因題剪刀峰之名。有四。南望曰一帆峰。西南望曰天柱峰。西望曰屏障峰。西北望曰剪刀峯。南行六七里。遇雨。至能仁寺。寺亦雁山之名寺。有白髮頭陀。對客縱談。山中之歷史及寺史。均約略能言之。

能仁寺之殿屋。亦破碎不堪。刻正修理。卽由莊君在此監修。少憩。卽至寺門。寺前有山。對寺而爲障。俗曰火燄山。山之脈。由西而東。曰筆架峯。曰木蓮背母峰。曰朝天鬼峯。曰接客僧峰。東行數十步。有琤琮之音。碎泝不絕者。則隔岸見有燕尾瀑也。岸之東爲雙溪口。旁有梅花水。曰西龍潭門。下曰霞映潭。南流卽爲照膽溪。寺之西數十步。有一大鐵鑊。埋於稻田中。底深七尺。厚七分。徑二十尺。余與白髮頭陀量之。約周五拓半。相傳爲宋元祐年所鑄。鐵質雖有損毀。然千餘年之古物。自當寶貴之也。

晚餐後。白髮頭陀談話。言及雁山之名寺。均毀於幾經兵燹之中。倘一一修改。恐非數千金不可。

夜宿能仁寺

一雨新涼。後萬山爽氣。多殘燈。憐古佛。白髮語。頭陀鐵鑊埋荒棘。石瓶懸碧蘿。隔溪聽燕尾。潭映曉霞酡。

夜間蚊雷如市。擾人清夢。起視四矚。天猶未明。仍返室臥。少頃。略睡。又爲蚊蟲所覺。張眼一觀。覺眼前窗戶。照見通紅之火。心甚奇之。急披衣起。向庭前瞭望。始知寺前紅日之影。山上五色雲霞。照澈窗戶。因恍然於火燄峰之所由名歟。廿一日。火燄峰。余始疑有溫泉。或曾爲火山窟。繼而晤叔南。知雁山百八十里中。絕無溫泉。然則火燄之說。果何所指。及今日所見。始知曉起則旭日光彩。奪人視線。晚間則餘霞成綺。返照滿山。乃狀物狀景之言。非實境也。在日輪未透出以前。但見火雲朶朶。散射前峯。倘入畫圖。不啻峰頭之火燄橫飛。此其所以有火燄之名也。

早餐後。別白髮頭陀而行。另給寺中飯食八角。卽乘轎往石門村。雇導游者一人。行三里許。見石峰雙峙。詢何名。導游者無以對。余曰。盍名雙劍峰。輿夫停止。余下轎。導游者引余往一古廟。見十八羅漢。又見一山。山厓上一石佛。樹林之中。厓壁之上。佛像甚多。不暇觀。卽乘轎行。途中曲折高低。山行久之。左爲羅漢岩。右爲獅

子鼻。十八里至石門村。離石門村數里。卽常雲岩。石門有金獅岩。旗岩。鼓岩。等均象形也。法警及輿夫二人在石門坐待。余偕導游者及輿夫一人同往雁湖。往返須三十餘里云。

時方清晨。氣候涼爽。余着草履。扶竹杖。興甚濃。拾級而登。連霄嶺。攀緣絕巘。道未及半。氣喘甚。坐石少憩。向輿夫所帶之水瓶飲水少許。乃前行。爲時一小時。始達連霄峰頂。左顧觀音峰。突出於衆山之上。右矚羣峰。間有龍嘴岩聳起。下即梅雨潭之瀑布也。前爲石馬村。倚芙蓉山之陰。小立片時。大有一攬衆山小之概。又行數里。道較平。惟余足力以疲乏。近年登山之體力。遠如華嶽遨遊以前矣。又行里許。無石路可尋。僅隨導游者向亂石間行。有時撥草尋可踐之石。或攀矮樹之枝而上。崎嶇喘息。困憊不堪。約行半小時。道平坦。遇樵夫數輩。乃自雁湖擔牛草下山者。詢雁湖到否。答以里許。於是鼓勇前進。須臾過兩嶺。纔見一片平蕪。雁湖至矣。先由第一湖。繞過一平岡。卽第三湖。兩湖皆淺水。平鋪。蘆葦彌目。沿湖行。水

數百步即是。猛向前行。始至石梁洞。洞高廿餘丈。左厓高峻。東有石天窗。右有深澗。飛瀑從一龍頭口噴出。仰視石梁。由東而西約十餘丈。洞中有屋三椽。偶像皆殘損。香火雖未燼。而冷落景象。守廟者頗以不能重修爲言。余題二十字於壁。厓高藏寺古洞奧。掛泉清此地不嫌寂。龍鳴日夜聲。

余由石級西面亂石中。下至深澗。澗底約十餘丈。坐石觀瀑。仰望之。方知此瀑布之奇。上自厓頂噴吐而出。約七八丈。有一半圓形之石壁。抱環此水。即成一玦狀之奇異景象。直瀉而下。至十餘丈外。如白練如飛泉。洶湧奔騰之勢。不可稍扼。至二十餘丈外。則如天女散花狀。再下十餘丈。則作鳴玉聲。迨近深潭。則其聲崆崆。噌吰。與大龍湫之飛雪捲珠。又大不相同。一則態度從容。一則形勢雄厚。各有竭盡之妙處。便非親歷其境。正不得漫爲評隲也。西石梁洞一名焦林洞。洞布大瀑布名西瀑布。

西瀑布(四十餘丈)

天矯若龍。掛錚鏦似玉。鳴晚霞斜照處。五色更鮮明。

在西石梁觀瀑布後。時已薄晚。乘轎行數里。過凌雲峰下。至上馬石胡宅。攜莊君紹介函。訪仲侯。留宿書齋。談雁湖之勝。並丐余爲仲侯作指畫。余允之。並贈詩一首。

夜宿上馬石胡宅口占贈仲侯

三日山中獨往還。龍湫雁蕩二靈間。晚來借榻胡瑗宅。雲淨天空月半環。

爲胡氏昆仲書贈聯云。龍谷觀秋水。雁湖披白雲。夜談甚快。臥已十二時矣。

二十二日晨。早餐後。別仲侯而行。結胡氏僕人小銀幣十角。乘肩輿繞道芙蓉嶺。望大芙蓉山而西行。胡宅對面。有一峰高聳者。曰挹秀峯。西行向北。即入梯雲谷之大路。余以急欲返樂清。故不及往游。且聞雲梯潭瀑布。遠不如梅雨潭。不游亦佳。

由上馬石四里。至長嶺山頭。村民甚多。有一小學校。即胡氏經辦。學生約四十餘。

人分一二年級。教員兩人。

行十里過一溪。溪水甚急。曰橫涇溪。又行十五里。山巒環抱。頗可觀。不知名也。此間已過大芙蓉村。出大芙蓉山之界矣。又二十里至虹橋飯店休憩。余甚疲倦。蓋自昨日登連霄峰。游雁湖往返四十里。體力大損。兩股欲斷。嘻。年來游山之興。雖濃。游山之體力已老。病頽唐矣。能無自概。速自勉。振精神。勿墮志。勿灰心也。飯後給午餐資八角。乘肩輿。人雖疲倦。克自振刷。在輿中補寫昨日所作之大龍湫長歌一首。以壯此次之游。惟一閩鄉先哲鄒先生之大龍湫記。則又爽然若失也。觀大龍湫瀑布賦長歌一首。

雁。蕩。之。山。高。且。奇。雁。蕩。之。瀑。繫。人。思。潺。潺。澗。水。滿。山。谷。宜。晴。宜。雨。各。有。時。惟。有。龍。湫。四。百。卅。餘。尺。上。下。一。線。綽。約。有。餘。姿。古。今。游。客。入。雁。蕩。龍。湫。之。名。無。不。知。我。來。山。中。僅。三。日。觀。此。飛。瀑。情。爲。移。聲。如。玉。屑。之。輕。墮。狀。如。馬。尾。之。風。吹。動。如。雪。濤。之。怒。湧。靜。如。珠。簾。之。夜。垂。仰。觀。飄。忽。疑。霧。縠。俯。觀。瀟。瀟。似。雨。絲。涼。飆。吹。散。幻。作。雲。烟。

障。雪。絮。紛。墜。鋪。作。琉。璃。墀。倘。逢。夕。照。彷彿。長。虹。晴。空。掛。更。遇。雷。雨。奔。騰。萬。馬。澗。谷。馳。廬。山。石。門。不。足。道。塵。寰。絕。境。其。在。斯。曾。讀。昔。賢。龍。湫。記。掩。卷。靜。思。猶。懷。疑。芒。鞋。竹。杖。親。履。此。方。知。奇。妙。且。陸。離。徘徊。久。之。往。復。不。忍。去。拈。毫。醮。水。拂。瓦。掃。蘚。題。新。詩。

下午三點鐘到樂清城勸學所。給轎夫四元二角。法警一元。函謝劉知事。並辭行。少頃往縣公署。晤劉知事。少談即別。

勸學所長鄭君贈余樂清隆慶志一部。計四冊。余無以酬。擬回錫後寄書數種以答謝之。且謂鄭君曰。擬將所著書百部。捐入雁蕩山中。爲修理雁山之助。捐書出售。以修雁山。亦風雅事也。

時有徐敏夫者。由樂清入都。由鄭君紹介。結伴同行。晤張君雲秋者。名武。談衡嶽風景。並與雁山比較久之。午餐後即偕徐君雇舟同行。給勸學所兩僕人共四角。余乘小舟。出樂清南水門。門乃一長橋。三洞。舟自出入。城外大河中心有一文昌。

閣在水中央。惜已失修。似嘉興煙雨樓景象。晚十時半至白象鄉。停舟。至徐君之戚黃氏。往晤陳君存齋。略談即臥。

二十三日。天未明。主人家僕役匠人等。已皆起而各事其事。足徵鄉間之勤務。久之。余亦起。偕徐君出門。在田隴間。望白象山風景。早餐後。卽雇舟行。至館頭。尙早。因海潮未至。須待至十點鐘。方能開船。見一忠烈廟。入門登殿。瞻神像。知爲唐時田公諱居邵。戰死於此者。後人立廟祀之。當年兵敗時。因子規啼而兵遂敗。海濱無子規啼。故聞聲而人心亂耳。十點半鐘。由館頭趁船至永嘉。一點半鐘。登岸。給船錢六角。登岸。忽遇包君翔仲。言及徐懷清病危。其弟君美來視疾。盍同往訪之。徐君別去。余偕包君先至永嘉縣立高小學校。繼至維新書局。晤梅君挹芬。略談。卽往醫院。視徐君懷清疾。並候伊弟公美。疾殊重。而手足無所措。醫來姑用藥。余見此客中病况。頗覺慨人事之變化。公美至爲愁悶。亦無法以謀轉機。余惟有略爲勸慰。公美暫守以待耳。少頃。余偕包君登海宴輪船。豫定艙位。豈知輪艙位已

滿。不得已。姑俟明日。包君云。吾蘇同鄉會。擬請足下及公美二人。夜宴。余堅却之。聞陳君龍文之母病。欲往訪之。以明日卽欲返滬。故不及往訪陳君矣。往訪孫君幹甫。取回前寄之箱及包兩件。適知幹甫夫人攜三子返錫。明日可以同行云。江蓬仙君來維新書局久談。晚飯後。又略談而去。

二十四日上午。在維新書局。爲梅孔江包四君。以指畫竹。爲紀念品。少頃。偕江君蓬仙。同往參觀第十中學校。校長朱隱青。教員三十餘人。學生三百三十餘人。畢業者六十餘人。新生招一百人。常年經費兩萬元。學費每人收十二元。膳費三元。制服費十元。本日適逢招考新生。由李教員達夫導觀一周而出。

參觀第十師範附屬小學校。主事蔡慎餘。字謹初。導觀各教室一周。是日爲暑假後開課之第一日。全校職員二十一人。經費六千九百餘元。學生六百三十人。高小六級一百八十人。國民分單式複式兩教室。單級一教室。共四百五十人。校訓勤慎勇三字。各教室有級訓。國民一年級之級訓。曰敬愛。每日有朝操。星期六下

雲朝朝。朝朝朝。朝朝散。潮長長。長長長。長長消。謝公亭前有斷碑俯仰二字。饒有筆力。惜仰字祇得半矣。西有徐班侯紀念塔。徘徊久之。陸公祠前。有石像三。余謂江君曰。南方造像尤可寶貴。勿糟蹋。宜珍藏之。余在謝公亭題詩一首於亭壁。

謝公亭

孤嶼聳江心。一亭自千古。我來俯仰間。風濤起擊鼓。雙塔壓象獅。江心寺之山。一爲象山。一爲獅山。諸神伏龍虎。寺中有降龍伏虎之神。永嘉好水山。子身忘痛苦。

文祠孟樓前。有吾邑鄉先賢秦小峴先生石刻小像。昔小峴先生備兵甌括。士林稱之。故刻像於石。以留去思。青田端木國瑚有贊。瑞安林從炯有跋語。余近年搜羅邑中文獻。今日得此。急錄大概。以備他日拾遺之選。臨行爲同人畫竹且贈以詩四首。

浙東旅行記

三十九

錫成公司代印

贈梅挹芬君

永嘉借徐榻。余兩次往返。永嘉均寫翰墨。緜翰墨締新緣。梅竹堪爲友。指頭揮灑妍。

贈孔雋願館長

贈我長篇欽健筆。答君枯竹表清風。樓頭斜日籬園話。萬卷詩書杖履中。

贈江蓬仙視學

聊以一竿竹報君。招待殷試看君子節。百尺聳青雲。

贈包翔仲君

往返雁山道。異鄉感舊知。臨行無所贈。尺幅慰相思。

返城午餐至輪船碼頭。梅君挹芬已將余之行李送至船中。包君來送行。因未見余。又登岸往尋。適孫君幹甫之夫人及其三子銘修亦乘輪船返滬。孫君爲余尋艙位。託一嚴姓者因待久之始得一官艙。艙位甚窄。價目較房艙多一元。乃將行。

李搬至艙中。而孫君等先去。永嘉勸學所李君。送來國語講演錄二冊。一贈余者。一託余帶至上海。送汪仲閣。汪君託余問仲閣。有託歐客之筆資收到否。少頃。梅江李諸君均別去。舟中同艙室者。爲直隸趙君道益。礦務公司之礦師也。共談頗有官氣。詢之爲北洋礦科畢業生。與之談中國礦產之地。經驗甚淺。遇徐君及孫銘修。常在甲板談話。稍解悶。遇暨南學生傅適立。樂清人。大同學生林姓。吳姓。皆青年中之可談者。晚大風雨。船頭顛蕩。余即臥。

二十五日在舟中補記日記及寫致京函。託徐君敏夫帶北京。

二十六日抵上海。知體操教員高女士不能赴錫。乃訪王君。重行紹介金女士。尙更赴錫。擔任余競志中學部體操。下午乘車返錫。得詩二首。

歸游紀程

回首浙東好山水。計程匝月漫游歸。巖疆閩越灘流險。風景岩湫塵境稀。廿里雁湖據峯頂。一天雷雨濕征衣。拾將拳石與芳草。聊記行踪認翠微。

浙東旅行記

四十

錫成公司代印

車中野望

故鄉亦有好風景。綠滿田疇翠滿村。最是夕陽顏色麗。餘霞成綺水成文。

余此次以暑假極短之光陰。作浙東之旅行。往返道路約千餘里。所最不能忘者。泰順灘河之險。瀑布之奇。雁山山頂之雁湖。二靈之奇峯。大龍湫。西石梁之飛瀑。是最足以壯余之行色者。至於交游之締結。則黃燮元知事之唱和。吟情。吳林翁林之研求教育。蔣叔南君之導游。二靈風景。指點諸峯名勝。鄭漢由君之主人情。重梅江王包孫陳之招待情殷。尤皆誌之。感之。不敢忘者也。既返競校。爰追述出發之日。至返錫之期。得四十日之浙東旅行記。一以誌勝游。一以誌友誼。

附錄在泰順爲黃燮元知事作羅陽治事錄序文一篇

羅陽治事錄序

泰順之山。蜿蜒。巨佳。氣鬱鬱。然知有美玉。內含。故森林茂也。澗溪之水。奔流。數百里。其聲可聽。知汨汨源泉。來有自也。使地蘊寶而不知所出。川有流而任其長逝。

靈秀所鍾與不毛等清濁不域濯纓足同亦曷貴有此天然之山水哉人具沈鬱之才圭璋之質不能磅礴發洩磨礱而成大器僅僅於巖疆僻壤小試百里抑亦可慨也夫居恆嘗謂國家設官分治無論職任之大小高卑用必當其才必竟其用否則朝秦暮楚東奔西馳又何以覘治績策上理耶庚申季夏余來泰順主講羅陽書院單級教授法應黃知事燮元之招也爲吳君桐園之紹介黃君先之以書曰永嘉山水甲浙東聞君好游願以浙東山水貸君匝月之講學可乎余報之曰可於是海行波折灘險瀕危抵此萬山中飽餐浙東山水聽口碑覘治理偕黃君上下其議論深以相見恨晚如黃君者文學雍容器識明達十年宰此泰順地方之福也乃官途蓬轉去任之檄倏來黃君撫然將與泰順別因出其羅陽治事錄七卷示余且屬弁一言爲游歷羅陽之紀念余讀其呈報辦理地方教育實業以及邊防軍務民刑訴訟之文足徵乃心民益捍衛邊圉也讀其批駁崇化寺租之處理邑廟提款辦學之判牘足徵提倡教育化朽腐而爲神奇也讀其規畫造

林倡辦蠶桑改良茶業開勘礦苗之議案又足徵改進固有之實業創闢未興之利源也卽此一編固可知黃君之才之質之器非百里巖邑所可限又可見泰順應興應革之端時往來於黃君胸臆戀戀不忍去而以泰順處崇山峻嶺急湍飛瀑間地寶不能闢水力不能用泰順士大夫之恥也余不文深願泰邑士大夫心乎黃君之心以留黃君之去思從事教育以謀普及整理實業以啓山林始不負此百里好山水大興天然之利益一洗羅陽之恥然則黃君雖去得稍施未竟其用之抱負黃君亦可稍慰矣乎敬書數言一爲黃君慰一爲泰順勵



民國九年十月雙十節出版

浙東旅行記全一冊

定價一角五分

著述者

侯

鴻

鑑

出版者

侯

鴻

鑑

發行處

無錫競志女學校

印刷所

無錫錫成印刷公司

分售處

上海商務印書館
上海中華書局
無錫文樂華書局

